

## Izvještaj o izvršenju sankcija u Kantonu Sarajevo za 2015. godinu

Ministarstvo pravde i uprave Kantona Sarajevo, dostavilo je Skupštini Kantona Sarajevo na razmatranje i usvajanje Izvještaj o izvršenju sankcija u Kantonu Sarajevo za 2015. godinu, koji je od strane Vlade Kantona Sarajevo prihvaćen na sjednici održanoj 05.04.2016. godine.

U skladu sa odredbama Zakona o izvršenju sankcija u Kantonu Sarajevo, („Službene novine Kantona Sarajevo“, br. 27/07 i 36/15), izvještaj o izvršenju sankcija, godišnje podnose nadležni organi: Općinski sud u Sarajevu, Kantonalni centar za socijalni rad, Odgojni centar Kantona Sarajevo, Ministarstvo unutrašnjih poslova Kantona Sarajevo i Kantonalna uprava za inspeksijske poslove.

Mjere i sankcije iz izvještaja su novčana kazna izrečena pravnom licu za krivično djelo, mjere sigurnosti i odgojne mjere izrečene počiniocima krivičnog djela i prekršajne sankcije, osim novčane kazne izrečene fizičkom licu.

Nadležni organi, u skladu sa propisanom metodologijom, izvještaj podnose Skupštini Kantona Sarajevo, putem Ministarstva pravde i uprave Kantona Sarajevo, koje daje mišljenje sa prijedlogom mjera za unapređenje stanja u ovoj oblasti.

Može se konstatovati da su dostavljeni izvještaji o izvršenju sankcija za 2015. godinu, kvalitetni, urađeni u propisanoj formi, obrađeni su svi relevantni podaci potrebni za ocjenu stanja i predmetne problematike. Nakon izvršene analize dostavljenih podataka, a u cilju poboljšanja stanja u navedenoj oblasti, Ministarstvo pravde i uprave Kantona Sarajevo je predložilo sljedeće mjere: upućivanje inicijative prema Vladi Federacije Bosne i Hercegovine, u pravcu usaglašavanja Zakona o izvršenju sankcija u Federaciji Bosne i Hercegovine sa Krivičnim zakonom Federacije Bosne i Hercegovine, Zakonom o zaštiti i postupanju sa djecom i maloljetnicima u krivičnom postupku i Zakonom o prekršajima u Federaciji Bosne i Hercegovine; nastavak aktivnosti, u skladu sa Akcionim planom za prevenciju maloljetničkog prestupništva i rad sa maloljetnicima u sukobu sa zakonom 2014. – 2016., u svim segmentima razvoja djece i mladih, sa fokusom na jačanje uloge porodice i institucija odgoja, obrazovanja, sporta i kulture, uz uključivanje lokalne zajednice; razvijanje i intenziviranje saradnje i koordinacije institucija sistema u provođenju potrebnih aktivnosti, (roditelji, škole, ustanove socijalne zaštite, nadležno tužilaštvo, zdravstvene ustanove), prilikom izvršavanja sankcija prema maloljetnicima; popunjavanje upražnjenih radnih mjesta vezanih za izvršenje sankcija, odgovarajućim kadrom sa adekvatnom školskom spremom, u Općinskom sudu u Sarajevu; obezbjeđivanje neophodnih finansijskih sredstava u Budžetu Kantona Sarajevo u narednom periodu za razvoj potrebnih kadrovskih i materijalnih kapaciteta u Javnoj ustanovi Kantonalni centar za socijalni rad i Kantonalnoj javnoj ustanovi Odgojni centar Kantona Sarajevo i obezbjeđenje dodatnog stručnog usavršavanja profesionalaca iz svih naučnih oblasti koje pokrivaju rad sa djecom i mladima.